



U ovom broju:

- ➔ **REBALANS BUDŽETA
OPĆINE TEŠANJ**
- ➔ **KAPITALNI PROJEKTI
ZA 2015. GODINU**
- ➔ **100 NAJVEĆIH
KOMPANIJA U BIH**
- ➔ **PROJEKAT OZNAČAVANJA
TRGOVA I ULICA**
- ➔ **ANALIZA MJERENJA
ZADOVOLJSTVA
KORISNIKA USLUGA**
- ➔ **NOVA PARKING MJESTA**
- ➔ **POSJETE TEŠNJU**
- ➔ **PRIJEM NAJBOLJIH
UČENIKA**



OPĆINA TEŠANJ

Trg Alije Izetbegovića 11

www.opcina-tesanj.ba

e-mail: optesanj@bih.net.ba





Izdaje: **OPĆINA TEŠANJ**

Redakcija:

Edina Kadušić, Ferid Mustafić, Samir Brka,
Kanita Gredelj i Bahrudin Nočić.

Glavni i odgovorni urednik:

Edina Kadušić

Adresa Redakcije:

Općina Tešanj, Trg Alije Izetbegovića 11
74260 Tešanj

Telefoni: 032 650-341 i 032/650-022 (lokal 107)

Fax: 032/650-220

E-mail: press@opcina-tesanj.ba

Tiraž: 2.000

Štampa: Grafik-komerc

IZGRADNJA DNEVNOG CENTRA ZA DJECU SA POSEBNIM POTREBAMA

Krajem aprila su zvanično počeli radovi na izgradnji objekta Dnevnog centra za djecu sa posebnim potrebama, a koji je Općina Tešanj izdvojila u prioritete u Strategiji razvoja 2007-2015 godina, te je opredjeljenje za podršku ovoj kategoriji uvršeno i u novu integralnu Strategiju razvoja do 2018. godine. Općina Tešanj je kroz grantove, kao i kroz projekte za konkretne aktivnosti podržavala rad Dnevnog centra, te pokazala interes da on bude održiv i u narednom periodu. Napor Općine Tešanj da on bude održiv bit će olakšan izgradnjom Centra koji će finansirati privatni donator, privrednik Hajrudin Ahmetlić. Vrijednost projekta je oko 250.000 KM.



REBALANS BUDŽETA OPĆINE TEŠANJ ZA 2015. GODINU

* Na 31. sjednici Općinskog vijeća Tešanj održanoj 15.juna 2015. godine usvojene su Izmjene i dopune Budžet Općine Tešanj za 2015.godinu.

* Ovim izmjenama i dopunama Budžet Općine je uvećan za 1.117.000 KM, tako da sada iznosi 14.971.000 KM, što je više od Budžeta za 2014.godinu za 2.118.000 KM.

* Jedan od razloga za izvršene izmjene je promjena u strukturi finansiranja projekta odvodnje i prečišćavanja otpadnih voda, na način da se uvećavaju grant sredstva za 600.000 KM, a umanjuje kreditno zaduženje za 500.000 KM. Okončanjem gradnje I faze, vrijednosti 2.400.000 KM, stvaraju se uslovi za konačno uređenje Titove ulice i Ulice I. marta. Upravo je obezbjeđenje sredstava za uređenje navedenih površina starog gradskog jezgra drugi razlog za izvršene izmjene Budžeta. Sredstva su planirana kroz kreditno zaduženje od 510.000 KM na period od 2 godine, a na rashodovnoj strani Budžeta je planirana stavka za realizaciju ovog projekta.

* Pored navedenog, potrebno je istaći da su izdvojena dodatna sredstva za sanaciju klizišta od 100.000 KM, te da su u Budžet uključena prenesena nerealizovana sredstva za dio projekata sa namjenskim sredstvima iz prethodne godine od 387.000 KM. Realizacija ovih projekata je već okončana u tekućoj godini ili je njihova realizacija u toku.

* Zbog gore navedenog, struktura prihoda i primitaka općinskog budžeta je izmijenjena u značajnoj mjeri u odnosu na prvobitni plan za 2015. godinu. Usporedna visina i struktura prihodovne strane Budžeta je iskazana u sljedećem tabelarnom pregledu:

Redni Broj	Grupa prihoda i primitaka	Budžet za 2015. godinu	Procent 3/suma	Izmjene i dopune Budžet za 2015. godinu	Procent 6/suma
1	2	3	4	5	6
1.	Direktni porezi	1.873.000	13,52%	1.913.000	12,78%
2.	Indirektni porezi	4.380.000	31,62%	4.430.000	29,59%
3.	Neporezni prihodi	2.536.000	18,31%	2.536.000	16,94%
4.	Tekući grantovi	1.655.000	11,95%	1.085.000	7,25%
5.	Kapitalni grantovi i primici	1.100.000	7,94%	2.300.000	15,36%
6.	Prenesena sredstva	610.000	4,40%	997.000	6,66%
7.	Kreditna sredstva	1.700.000	12,27%	1.710.000	11,42%
	SVEGA PRIHODI I PRIMICI	13.854.000	100,00%	14.971.000	100,00%

* Također je došlo do značajnije izmjene visine i strukture rashodovne strane Budžeta, koja je iskazana u sljedećem tabelarnom pregledu:

Redni broj	Grupa rashoda i izdataka	Budžet za 2015. godinu	Procent 3/suma	Izmjene i dopune Budžet za 2015. godinu	Procent 6/suma
1	2	3	4	5	6
1.	Sredstva za plate i naknade	2.285.000,00	16,49%	2.285.000,00	15,26%
2.a	Direktni materijalni rashodi Organa uprave	856.000,00	6,18%	868.000,00	5,80%
2.b	Ostale usluge za opštredruštvene potrebe	1.747.000,00	12,61%	1.877.000,00	12,54%
3.	Tekući grantovi, kamate i sredstva rezervi	3.520.000,00	25,41%	3.561.000,00	23,78%
4.	Kapitalni grantov i (transferi) i izdaci	5.346.000,00	38,59%	6.175.000,00	41,25%
5.	Povrat sredstava finansiranja	100.000,00	0,72%	205.000,00	1,37%
	SVEGA RASHODI I IZDACI	13.854.000,00	100,00%	14.971.000,00	100,00%

ODRŽANA 31. SJEDNICA VIJEĆA

U sali Općinskog vijeća Tešanj, 15. juna sa početkom u 14,00 sati održana je 31. sjednica Općinskog vijeća, sa predloženim dnevnim redom:

1. Prijedlog Odluke o izmjenama i dopunama Budžeta Općine Tešanj za 2015.godinu,
2. Prijedlog Odluke o izmjenama i dopunama Odluke o izvršavanju Budžeta Općine Tešanj za 2015.godinu,
3. Prijedlog Odluke o kreditnom zaduženju Općine Tešanj za realizaciju kapitalnih projekata,
4. Prijedlog Odluke o osnivanju, upravljanju, raspolaganju i korištenju stambenog



fonda uz primjenu principa socijalnog stanovanja,

5. Prijedlog Odluke o stambenom zbrinjavanju korisnika kolektivnih vidova smještaja kroz implementaciju projekta "Zatvaranje kolektivnih centara i alternativnog smještaja putem osiguranja javnih stambenih rješenja",
6. Prijedlog Odluke o izmjenama Odluke o usvajanju i provođenju Regulacionog plana „Poslovna zona Glinište“ općina Tešanj,
7. Prijedlog Odluke o odobravanju prodaje zemljišta neposrednom pogodbom u Mekišu,
8. Prijedlog Odluke o odobravanju raspisivanja javnog konkursa u Poslovnoj zoni "Bukva",

9. Prijedlog Odluke o prodaji zemljišta neposrednom pogodbom u Ljetiniću,
10. Prijedlog Odluke Odluka o prodaji zemljišta neposrednom pogodbom kod Hotela u Tešnju,
11. Informacija o realizaciji zaključka Općinskog vijeća o oslobađanju od plaćanja kamata u postupcima izvršenja.
12. Prijedlog Rješenja o imenovanju Komisije za sprovođenje javnog nadmetanja - licitacije u postupku prometa općinskim zemljištem,
13. Prijedlozi Rješenja o razrješenju i imenovanju Komisije za ravnopravnost polova, Komisije za predstavke i prijedloge, Statutarne komisije i



Zakonodavno pravne komisije Općinskog vijeća Tešanj.

Na početku sjednice dnevni red je, na prijedlog Općinskog načelnika, dopunjen sa 14. tačkom dnevnog reda: *Prijedlog Odluke o korištenju sredstava za posebne namjene.*

Najviše rasprave je bilo oko prve dvije tačke dnevnog reda - *Prijedlog Odluke o izmjenama i dopunama Budžeta Općine Tešanj za 2015. godinu i Prijedlog Odluke o izmjenama i dopunama Odluke o izvršavanju Budžeta Općine Tešanj za 2015. godinu*, koje je Vijeće uz dodatna pojašnjenja prihvatilo. Rasprave je bilo i o ostalim tačkama dnevnog reda. Vijeće je završilo sa radom u 18,40 sati.

IDEJNI PROJEKAT TOPLIFIKACIJE OPĆINE TEŠANJ

Nakon provedenog postupka javne nabavke, Općinski načelnik Suad Huskić i direktorica firme *Urbis Centar Banja Luka* Snežana Mrđa-Badža potpisali su ugovor za izradu *Idejnog projekta toplifikacije općine Tešanj*.

Radi se o projektu toplifikacije obnovljivim ekološki prihvatljivim izvorima energije u okviru projekta *Toplifikacija Pousorja - općina Tešanj, Usora i Doboj Jug izvorima obnovljive energije*.

Rok za završetak izrade projekta je 60 dana od dana potpisivanja ugovora.



POSJETA GRADILIŠTIMA

Ministar za poljoprivredu, šumarstvo i vodoprivredu ZDK Himzo Smajać i Općinski načelnik Suad Huskić sa saradnicima posjetili su gradilišta na području općine Tešanj – vodovode Medakovo-Trepče i Mekiš-Roše.

Ovom prilikom sreli su se sa izvođačima radova i predstavnicima građevinskih odbora, te razgovarali o planovima za nastavak gradnje i puštanju vodovoda u funkciju.

Vrijednost trenutne faze radova na oba vodovoda je oko 230 000 KM.



PROJEKAT OZNAČAVANJA ULICA I TRGOVA

Općinski načelnik Suad Huskić i direktorica *CILAP-a* (Izgradnja kapaciteta za unapređenje zemljišne administracije i procedura u BiH) Anđa Zimić potpisali su Ugovor o zajedničkom finansiranju projekta označavanja ulica i trgova nazivima i zgrada brojevima, te izradom adresnog registra za dio teritorija općine Tešanj.

Ugovor podrazumijeva nabavku ploča sa nazivima ulica i trgova, pločice sa kućnim brojevima i stubove za postavljanje ploča sa nazivima ulica i trgova.

Rok za realizaciju ugovora je šest mjeseci od dana potpisivanja ugovora sa izvođačem radova, koji će biti izabran u skladu sa postupkom javne nabavke.



III FAZA RADOVA U POSLOVNOJ ZONI GLINIŠTE

U toku su radovi na realizaciji Ugovora za III fazu radova u Poslovnoj zoni Glinište u iznosu od 1 15 000 KM.


Radi se o izgradnji (trasiranju) nove saobraćajnice, od Rosulja prema Alpini u dužini od 750 m.

Izvođač radova, firma Porobić d.o.o. Zavidovići je izvela pripreme radove, a u toku je iskop zemljanog materijala i pripreme za izradu tamninskog sloja.



ANALIZA PRVOG MJERENJA ZADOVOLJSTVA KORISNIKA USLUGA

Na sastanku menadžmenta Općine izvršena je analiza rezultata prvog mjerenja zadovoljstva korisnika usluga (poslovni subjekti) za 2015. godinu. Kako je i planirano, mjerenje je izvršeno od 1. do 3. juna 2015. godine metodom telefonskog anketiranja sa anketnim pitanjem "Zadovoljan sam uslugama koje pruža Općina Tešanj, ocjena 1-7). Od 46 firmi planiranih za prvo ovogodišnje anketiranje njih 43 odazvalo se na pozive (93,48 % od pozvanih) i ocijenilo kvalitet usluga koje prema njima pruža općinska administracija, te dalo dodatne primjedbe, prijedloge, sugestije ili komentare za ocjenu.



U anketiranju su sudjelovale odgovorne osobe iz firmi ili osobe koje direktno sudjeluju u procesu realizacije usluga za vlastitu firmu. Ocjenama je obuhvaćeno oko 1.670 usluga koje je Općina realizirala prema poslovnim subjektima, ili, prosječno, oko 40 usluga po anketiranom subjektu. Najveći broj anketiranih firmi (92,81 %) za svoje potrebe realiziralo je više od 10 usluga, njih 5,09 % u prosjeku 5-10 usluga godišnje, a 2,1 % zatražilo je do 5 usluga Općine na godišnjem nivou.

Gledano po strukturi anketiranih predstavnika firmi, u anketi je sudjelovalo 18 žena i 25 muških, od kojih 17 sa visokom, 10 sa višom i 16 sa srednjom stručnom spremom.

Srednja izvedena ocjena ove ankete je 6,14

(maksimalna ocjena 7), što je u odnosu na prvo anketiranje u 2014. godini povećano za 0,01 (u 2014. ocjena 6,13). Posmatrajući ocjenu u odnosu na maksimalnu moguću, sa aspekta ispunjenja očekivanja, postotak ispunjenja je 87,71 %.

S obzirom da Općina ocjenu zadovoljstva korisnika usluga provodi dva puta godišnje po jedinstvenoj metodologiji za svako od ova dva anketiranja, sljedeća anketa će se realizirati u novembru i ona je detaljnija, a dat će odgovore na 22 pitanja iz oblasti očekivanja za bilo koju općinu u BiH, te 22 pitanja sa konkretnim ocjenama za Općinu Tešanj iz oblasti pouzdanost (4 pitanja), odgovornost (5), sigurnost (4), empatija (4) i opipljivost (5 pitanja). Ova ocjena i ocjena sa prvog ispitivanja zbrajaju se i njihov prosjek čini godišnju ocjenu mjerenja zadovoljstva korisnika usluga.

Tako posmatrana, ocjena za 2014. godinu bila je 5,43, te je ocjena prvog ispitivanja za ovu veća za 13,08 % u odnosu na ukupnu prošlogodišnju ocjenu.

Menadžment je ovu ocjenu uz definiranje mjera za poboljšanje, a na prijedlog PRK&O, na današnjem sastanku i verificirao.

UDRUŽENJA IZ ŠVICARSKJE POSJETILA TEŠANJ



Predstavnici udruženja *Bosanski ljiljani* Lucern i KUD *Bosna Basel* iz Švicarske boravili su u dvodnevnoj posjeti Tešnju. Ovom prilikom, predsjedavajući Općinskog vijeća Senad Subašić i pomoćnik Općinskog načelnika Sabahudin Omerbašić primili su goste u Općini, te im nakon predstavljanja općine Tešanj, uručili skromne poklone kao znak pažnje za pomoć koju su pružili tokom prošlogodišnjih poplava. Tokom boravka u Tešnju, gosti su posjetili Gradinu, Eminagića konak i Čaršiju, te položili cvijeće na Centralno spomen obilježje šehidima i poginulim borcima i na mezar Muse Ćazima Ćatića. Također, učestvovali su na koncertu pod nazivom *Promocija kulturnog blaga BiH koju njeguju Bošnjaci u Švicarskoj*.

U organizaciji turističke zajednice Mostar Sjever održan je Međunarodni sajam privrede, poljoprivrede, prehrane i turizma - *Dani trešnje 2015*.

Ovogodišnji Sajam, pod motom *Domaće je najbolje* je otvorio Federalni premijer Fadil Novalić, a Sajam je okupio preko 100 izlagača. Partner događaja je bila Republika Mađarska, uz promociju svoje najpoznatije termalne banje iz grada Harkany. Osim mađarskih, na Sajmu su se, uz domaće, predstavili i izlagači iz Srbije, Crne Gore, Hrvatske i Makedonije.

U mnoštvu zanimljivih i raznolikih sadržaja, općinu Tešanj su predstavili UG *Sehara* i JU *Muzej Tešanj*. Na paviljonu, koji je postavom i vizuelnim efektima privukao veliku pažnju posjetilaca, predstavljen je dio tradicije i kulturno-historijske baštine tešanjskog kraja. Naročitu pažnju su privukle rezbarije u drvetu, te bosanske frule majstora Safeta Salkanovića iz Medakova.

Osim pažnje koju je privukao naš paviljon, općina Tešanj je u još jednom segmentu bila u centru pažnje. Općinski načelnik Suad Huskić, po kriterijima organizatora Sajma proglašen je *Načelnikom godine 2015*. - za postignute rezultate u razvoju lokalne zajednice.



PRIZNANJA ZA 100 NAJBOLJIH KOMPANIJA U BIH

Izbor 100 najvećih kompanija u BiH, ove godine Poslovne novine realizirale su u saradnji sa Vanjskotrgovinskom komorom BiH (VTK BiH), a dodjela priznanja kompanijama koje su u prošloj godini ostvarile najbolje rezultate poslovanja održana je u Sarajevu. Prema rezultatima poslovanja, tešanjске firme su zastupljene u svim kategorijama.

U kategoriji velike kompanije našle su se *Hifa-oil*, *AS*, *Fad*, *Hifa*, *Pobjeda*, *Mann+Hummel BA*, *Kantić touristik*, *BME* i *Madi*.

U kategoriji srednjih firmi, svoje mjesto među najuspješnijim našle su firme *AC Školjić*, *Koala paintings*, *Artisan*, *Medena commerc* i *InoxAjanović*.

Felbermayr Bosnia, *Agrocentar MBI*, *Zammah* i *Hrast*, tešanjске su firme koje su se našle u kategoriji uspješnijih malih preduzeća.

Također, po pojedinim djelatnostima, među prvih 20 u BiH su:

- u trgovini: *Hifa-oil* na 4 poziciji i *AS* na 20 poziciji,
- u prehrambenoj proizvodnji: *Madi* na 8 poziciji,
- u proizvodnji namještaja: *Artisan* na 14 poziciji, i
- u proizvodnji pića: *Zema* na 20 poziciji.



Dodjela priznanja najuspješnijim kompanijama prethodila je panel diskusija o temi *100 najvećih u BiH u svjetlu Sporazuma o stabilizaciji i pridruživanju BiH Evropskoj zajednici*.

KADETI AMERIČKE VOJSKE POSJETILI TEŠANJ



U okviru posjete Bosni i Hercegovini, kadeti vojske SAD-a u društvu pripadnika Oružanih snaga BiH, boravili su u Tešnju. Goste je primio Općinski načelnik Suad Huskić i kroz prezentaciju predstavio općinu Tešanj.

Drago mi je da smo imali priliku ugostiti kadete američke vojske i predstaviti im našu općinu. Nadam se da će ponijeti pozitivne utiske i na taj način promovirati Tešanj, kazao je Općinski načelnik Suad Huskić.

Nakon sastanka u Općini, gosti su posjetili Gradinu i Eminagića konak.

NOVA PARKING MJESTA



Općinski načelnik Suad Huskić i direktor firme Hrvic-gradnja, Elvir Hrvic potpisali su ugovor za djelomično natkrivanje rijeke Tešanjke i izvođenje radova na izgradnji novih parking mjesta na lokaciji Katanga u Tešnju.

Nakon odluke Općinskog vijeća, provedena je procedura javnog poziva i izabran je najpovoljniji ponuđač. U skladu sa Ugovorom, firma Hrvic-gradnja će do kraja 2015. godine završiti izgradnju parkinga i koristiti ga narednih 10 godina, nakon čega se on vraća Općini Tešanj, kazao je Općinski načelnik Suad Huskić.

PREDSTAVLJANJE USLOVA POSLOVANJA I PODSTICANJA NOVIH INVESTICIJA U OPĆINI TEŠANJ

U utorak, 26. maja u Neumu je održana Konferencija o uslovima poslovanja u jugoistočnoj Evropi i mogućnosti saradnje na polju podsticanja ekonomskog razvoja i novih investicija. Pred više od 130



učesnika ovog događaja iz Bosne i Hercegovine, Hrvatske, Makedonije, Srbije i međunarodnih organizacija (GIZ, SDC, USAID, Sida), razgovaralo se o investiranju u regionu i stvaranju povoljnog poslovnog okruženja.

Naša Općina pozvana je da kao učesnik u procesu certifikacije za povoljno poslovno okruženje (BFC SEE) predstavi ispred BiH, svoj vlastiti primjer dobre prakse u ekonomskom razvoju.

O pozicioniranju Tešnja kao povoljne investicione destinacije govorio je pomoćnik Općinskog načelnika Hamzalija Hojkurić koji je kao učesnik Panela istakao da je Općina u zadnjih 10-tak godina mnogo uradila kako bi podstakla ekonomski razvoj, kroz uređenje poslovnih zona, uvođenje pogodnosti za investitore, poticaja za mlade poduzetnike, stipendiranje, efikasnu administraciju, što je počelo davati rezultate kroz nove investicije kako domaćih tako i stranih ulagača, proširenje kapaciteta postojećih firmi i nova zapošljavanja.

UGOVORI ZA I DIO KAPITALNIH PROJEKATA

Nakon provedene procedure javne nabavke, potpisani su ugovori za prvi dio kapitalnih projekata za 2015. godinu.



Ugovore su potpisali Općinski načelnik Suad Huskić i predstavnici firmi **AB trans d.o.o.** Tešanj (za projekte u MZ Rosulje - Agići-Bajina glava, MZ Mrkotić - Žiže-Kukuljevac, MZ Tešanjka - Bedaci-Numera i MZ Vukovo - Banovci-Pašići), **Dobojputevi d.o.o.** Doboj Jug (za projekte u MZ Ljetinić - Plac-šljunkara i MZ Karadaglije - Čatin greb, MZ Jelah - Izgradnja trotoara i bankina u Poslovnoj zoni Ciglana, MZ Piljužići - Sole-Zovke, MZ Kalošević - Most-Lete, MZ Jablanica - Čaglići i MZ Dobropolje-Mekiš - Aleksići-Mujezinovići) i **Trans-kop d.o.o.** Tešanj (za projekte u MZ Dž. Planje - Muharemovići i MZ Kalošević - Begova kuća).

Danas smo potpisali 13 ugovora za prvi dio kapitalnih projekata

koji će biti finansirani iz našeg budžeta. U toku je ugovaranje i druge grupe projekata. Očekujem da će svi projekti biti uspješno realizovani do kraja građevinske sezone, kazao je Općinski načelnik Suad Huskić.

Ukupna vrijednost potpisanih ugovora je oko 170 000 KM.

IZGRADNJA PUTEVA

Nakon zaključenja ugovora i uvođenja izvođača u posao, počela je realizacija kapitalnih projekata I faze radova. U toku su radovi na dionicama puteva NC Čaglići u MZ Jablanica i NC Aleksići-Mujezinovići u MZ Dobropolje-Mekiš. Izvođač radova je firma *Dobojputevi d.d.* Doboj Jug. Također, počeli su radovi na dionici puta Banovci-Pašići u MZ Vukovo. Izvođač radova je firma *AB trans d.o.o.* Tešanj



SANACIJA KLIZIŠTA

Izvođač radova, firma *Transkop d.o.o.* Tešanj je završila sanaciju klizišta na putnoj infrastrukturi u Kaloševiću, a u toku su završni radovi i na sanaciji klizišta u Dž. Planjama.

Također, firma *Dobojputevi d.d.* Doboj Jug je počela radove na sanaciji klizišta na putnoj infrastrukturi u Karadaglijama (Čatin Greb). Uskoro slijedi nova faza radova.



AUSTRIJSKI BIZNISMENI U DVODNEVNOJ POSJETI OPĆINAMA TEŠANJ – TESLIĆ – ŽEPČE

U organizaciji Ambasade Savezne Republike Austrije u Bosni i Hercegovini od 27. do 28. maja održat će se susreti austrijskih privrednika sa privrednicima i predstavnicima općina Tešanj, Teslić i Žepče pod nazivom *Finding Mission – BEAR zona i srednja Bosna*. U delegaciji austrijskih privrednika nalaze se predstavnici sedam kompanija iz različitih sektora, predstavnici trgovinske komore, te predstavnici ambasade R. Austrije.

Prvog dana susreta, u Banji Vrućici kod Teslića predviđena je prezentacija BEAR zone, domaćih i austrijskih kompanija, a načelnici tri općine Suad Huskić (Tešanj), Milan Miličević (Teslić), i Mato Zovko (Žepče), prezentirat će potencijale svojih lokalnih zajednica austrijskim biznismenima. Drugog dana susreta planirane su posjete i razgovori u kompanijama Destilacija Teslić, Pobjeda Tešanj, Mann&Hummel BA Tešanj, AS Jelah, Titanic Žepče i Sliško Metali Žepče.

Radujemo se posjeti predstavnika Austrijske ambasade i austrijskih privrednika. Vjerujem da će austrijski gosti pronaći sagovornike radi uspostave poslovne saradnje na obostranu korist. Postigli smo regionalnu prepoznatljivost, kroz međusobnu saradnju i posvećenost naših općina da kreiraju pozitivan poslovni ambijent. Pozdravljam novi kurs Evropske unije prema Bosni i Hercegovini i očekujem da će stupanje na snagu Sporazuma o stabilizaciji i pridruživanju donijeti napredak na polju ekonomije, ali i drugih područja, kazao je Općinski načelnik Suad Huskić.

Riječ je o samostalnoj posjeti austrijskih biznismena u organizaciji Austrijske ambasade, a koji su pokazali interes da naprije posjete općine i uspješne kompanije ove regije sa namjerom upoznavanja sa resursima i mogućnostima za uspostavljanje poslovne saradnje i investiranje.



DELEGACIJA OPĆINE ŠOŠTANJ POSJETILA TEŠANJ

Načelnik općine Šoštanj (R. Slovenija) Darko Menih sa svojim saradnicima posjetio je danas općinu Tešanj i ovom prilikom se sastao sa Općinskim načelnikom Suadom Huskićem. Sastanku su prisustvovali i predsjedavajući Općinskog vijeća, pomoćnici Općinskog načelnika i direktor Mješovite srednje škole Tešanj.

Tokom sastanka nastavljen je razgovor o mogućnostima saradnje dvije općine na projektima iz oblasti obrazovanja, privrede i kulture. Dogovorene su konkretne aktivnosti - u narednom periodu bit će potpisan i Protokol o saradnji dvije općine, a sve u cilju zajedničke aplikacije i realizacije projekata Evropske unije.



PRIJEM NAJBOLJIH UČENIKA OSNOVNIH I SREDNJIH ŠKOLA

Općinski načelnik Suad Huskić 11. juna primio je najbolje učenike devet osnovnih i tri srednje škole. Riječ je o tradicionalnom prijemu Općinskog načelnika koji se svake godine održava za učenike generacije, učenike sa posebnom diplomom sa prosjekom 5,0 tokom cijelog školovanja, kao i za direktore škola, profesore i roditelje.

Ovom prilikom, Općinski načelnik je razgovarao sa učenicima generacije o planovima za budućnost i njihovom daljem školovanju.

Ovo je samo dio aktivnosti koje provodimo u cilju afirmacije rada, znanja, i mladosti. Najbolja investicija za prosperitet i razvoj je investicija u znanje. Zato nas institucije i investitori, kako domaći, tako i strani, prepoznaju kao pouzdane partnere za budućnost. U posljednje tri godine mandata ove općinske administracije, investirano je oko milion maraka u stipendije za dodiplomske studije, pri čemu je stipendije dobilo preko 1.000 studenata sa područja Tešnja. Isto tako, naši studenti imaju podršku za odbranu magistarskih i doktorskih radova. A, u cilju afirmacije srednjih škola i fakulteta za učenike, studente i roditelje Općina je organizirala dva Sajma srednjih škola i fakulteta, sa namjerom da nastavimo sa ovakvom praksom. Ovome treba dodati i provedbu programa prekvalifikacije i dokvalifikacije kroz Centar za obrazovanje odraslih, kazao je Općinski načelnik Suad Huskić.



U okviru Projekta unapređenja lokalnog razvoja – *GOLD*, u novoj sali Vijeća održan je trening za start up kompanije. Trening je bio namjenjen za mlade poduzetnike koji su pokrenuli vlastiti biznis kroz projekat *Najbolje poslove ideje za mlade*, a koji Općina Tešanj provodi već petu godinu zaredom. Tokom treninga, predstavljeni su preduslovi rasta i razvoja biznisa u start up fazi, poslovno planiranje, tržište i promocija, kao i upravljanje finansijama.

Trening su zajednički realizovali predstavnici Općine Tešanj i predstavnica *USAID-Sida GOLD Projekta*, Aida Soko.



DEMINIRANJE U MZ KALOŠEVIĆ

Početkom juna mjeseca je u prisustvu predstavnika Službe civilne zaštite, predstavnika BH MAC-a Regionalni ured Tuzla i predstavnika Federalne uprave civilne zaštite u svojstvu izvođača deminiranja, izvršeno otvaranje projektnog zadatka *Vrela*, površine 80.148 m² koji se realizuju metodom tehničkog izviđanja. Ovo je nastavak ranijih aktivnosti na deminiranju površina na potezu Bugarinovići -Vrela u MZ Kalošević.



MJERENJE ZAGAĐENOSTI ZRAKA

Predstavnici *Metalurškog instituta „Kemal Kapetanović“ Zenica*, na zahtjev Općine Tešanj, tokom mjeseca juna su na području Miljanovaca, vršili mjerenje zagađenosti zraka putem mobilne stanice, koja je tridesetak dana vršila očitavanje koncentracije polutanata zajedno sa meteorološkim podacima. Instaliranje ove mobilne stanice predstavljao je četvrti krug mjerenja zagađenosti, a navedene aktivnosti se provode u okviru ciljeva Strategije za dostizanje vizije -*Tešanj, sredina ekološke svijesti, čistoće i reda*.



POSJETA PREDSTAVNICE AMBASADE JAPANA U BIH

Koordinatorica za projekte u Ambasadi Japana u BiH Džulija Vit, u mjesecu maju je posjetila Općinu Tešanj, gdje je sa predstavnicima Službe civilne zaštite razgovarala o realizovanim projektnim zadacima deminiranja u 2014. godini koje je finansirala Vlada Japana putem *Grassroots* projekta. Cilj posjete je bio da se koordinatorica detaljnije upozna sa dosada realizovanim projektom, kao i predloženim novim projektom za 2015. godinu koji su u fazi evaluacije. Nakon razgovora u Službi civilne zaštite upriličen je i obilazak područja općine Tešanj koji su deminirani kroz navedeni projekat.





"Tešanj - Vaš partner za budućnost"

www.opcina-tesanj.ba